

PRICE (PRYS), THEODORE (1570? - 1631), prebendari yn abaty Westminster, prifathro Hart Hall, Rhydychen

Enw: Theodore Price
Dyddiad geni: 1570?
Dyddiad marw: 1631
Rhiant: Margery Stanley
Rhiant: Rhys ap Tudur ap William Vaughan
Rhyw: Gwryw
Galwedigaeth: prebendari yn abaty Westminster, prifathro Hart Hall, Rhydychen
Maes gweithgaredd: Crefydd; Addysg
Awdur: William Llewelyn Davies

Ganwyd yn Bronyfoel, plwyf Llanenddwyn, Sir Feirionnydd, mab [Rhys ap Tudur ap William Vaughan](#) o Gilgerran (gweler [Vaughan](#), Corsygedol) a Margery, merch Edward Stanley, cwnstabl Harlech. Aeth i Goleg All Souls, Rhydychen (B.A. 16 Chwefror 1587/8, M.A. 9 Mehefin 1591, cymrawd o Goleg yr Iesu, D.D. (o New College) 15 Gorffennaf 1614). Bu'n brifathro Hart Hall (Coleg Hertford yn awr), Rhydychen, o 1604 hyd 1614. Cafodd fywoliaeth Llanfair-juxta-Harlech ar 18 Hydref 1591; yn 1601 cafodd reithoraeth segurswydd Llanrhaeadr-yng-Nghinmerch, nid Llanrhaiadr-ym-Mochnant, fel y dywed y *D.N.B.* Cafodd fywoliaethau, etc., yn Lloegr hefyd. Ar 9 Medi 1596 gwnaethpwyd ef yn brebendari Winchester, yn 1609 daeth yn rheithor Launton yn sir Rhydychen - (yr oedd cyn hynny yn offeiriad Bletchingley yn Surrey) - yn 1621 gwnaethpwyd ef yn brebendari Leighton Buzzard yn eglwys gadeiriol Lincoln, ac, yn 1623, yn brebendari yn abaty Westminster. Yr oedd ei gâr, y [deon John Williams](#) (yr archesgob John Williams wedyn), yn noddwr iddo; gwnaeth [Williams](#) ef yn is-ddeon Westminster. Mynnai [Williams](#) (a Laud hefyd) ei weld yn esgob (gweler *D.N.B.*, nodiad yr [esgob Humphrey](#) yn arg. Bliss o *Athenae* Anthony Wood, a'r *Calendar of Wynn Papers*, rhif 968). [Williams](#) hefyd a'i henwodd ef i fod yn un o'r comisiynwyr a oedd i ystyried cyflwr gwleidyddol ac eglwysig Iwerddon; gweler *Cal. of Wynn Papers*, rhifau 1002 a 1003. Y mae gan [Siôn Phylip](#), ei gymydog ym Meirionnydd (a châr, o bell), gywydd iddo (N.L.W. Mostyn MS. 144) a chyfeiriad ynddo at ei obaith y gwneid Price yn esgob. Yn nes ymlaen cododd anghydfod rhwng y deon a'r is-ddeon a phan fu'r is-ddeon farw (15 Rhagfyr 1631) oedwyd ei gladdu yn abaty Westminster am chwe diwrnod oblegid i'r deon awgrymu i Price farw yn Babydd. Dywed William Prynne (*Canterburies Doom*, gweler Wood, *Athenae*) i Price fyw bywyd moethus, heb bregethu, a'i fod yn Armin, ac ychwanega iddo ymgymodi ag Eglwys Rhufain cyn ei farw. Heblaw [Siôn Phylip](#) canodd cymydog arall, [Edmwnd Prys](#), archddiacon Meirionnydd, gywydd i Price ([T. R. Roberts](#), *Edmwnd Prys*, gan ddyfynnu o B.M. Add. MS. 14874), a dengys [E. D. Jones](#) (yn *N.L.W. Journal*, v, 234, 236) i [Humphrey Davies](#), ficer Darowen, ewythr i Price, ysgrifennu N.L.W. Brogyntyn MS. 2, sydd yn cynnwys cywyddau, i'w anfon i Price a oedd ar y pryd yn offeiriad Bletchingley, Surrey ac yn ganon yn eglwys gadeiriol Winchester.

Awdur

Syr William Llewelyn Davies, (1887 - 1952)

Ffynonellau

At y ffynonellau a roddir yn *Oxford Dictionary of National Biography* ac yn yr erthygl ychwaneger *Heraldic Visitations of Wales and Part of the Marches between the years 1586 and 1613, under the authority of Clarenceux and Norroy, two kings at arms* (Llandovery 1846), ii, 223, a'r *Y Genedl Gymreig*, 10 Mai 1929

Dolenni Ychwanegol

VIAF: [76185925](#)

Wikidata: [Q7781956](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Nghymru a thu hwnt.

Ewch i'n [tudalen codi arian](#) am ragor o wybodaeth.

